

閩中撫聞卷五

閩晉江原雲程孫鵬輯

延平府

漢時邵武庸嶺北濕中有大蛇為人患巫言神吹童女乃可饜前
後嚮送凡九人將樂李誕有少女名寄受令長直應之自買好
劍作數石米飯以蜜澆之置諸穴蛇夜出食餌目光如鏡寄放
犬咋之從後以劍斫之蛇踊出而死東越王聞而壯焉聘以為
后

晉雷煥得二劍於豐城獄中一與張華一留自佩華報煥書曰詳

閩中撫聞

延平府

觀劍文乃干將也莫邪為何不至天生神物終當合耳華死失
劍所在其後煥子為建安從事佩劍經延平津劍忽躍入水使
人沒水求之見兩龍相隨人謂雙劍復合云

丁焯登延津城樓詩云澄潭龍老已千秋夜夜寒光動斗牛有客
携琴瞻碧漢何人說劍向滄洲孤城削壁全臨水八面無山不
到樓取次高懷生遠致一聲長嘯起驚鷗丁為觀察雁水焯之
弟晉江人

王鈐劉將軍廟碑文略云將軍者五季時閩王審知部將劉瓚也
將軍從審知起固始王閩中審知殂諸子相殘內難屢作巨寇

乘之橫潰莫支留從効送款於金陵李仁達投降於吳越將軍擁孤軍奄據屬郡既度其主之不足以有閩又度其力之不足以摧敵群黎依之倉皇失謀萬歲之呼黃袍之加忠臣不能無動焉茲朱文進之所以失國陳橋之所以代周也邨溫序之鬚以自裁酒侍中之血以見志者誰焉嗟乎將軍不以一時南面之樂而易其生平報主之忠不以同盡有限之生而喪其永存不死之氣要之輕重素明取合素定可貧可賤可殺之權於天者素完故生乎濁世而不知其光迫於機宜而不怵於利蹈乎過涉而必殘其軀其慷慨激烈較之歐史所稱王彥章裴約劉

閩中撫聞

延平府

二

仁瞻三君子者彼曷以加焉

青邱石在尤溪宣化門前平水灘唐異僧黃涅槃過此留偈云塔前青邱見家家親筆硯水流保安前尤溪出狀元先是尤溪未有登第自宋林積登慶歷六年進士第邑人始知學宣和中士風漸盛南渡後青石如邱則比戶絃誦矣石高丈餘

廖剛居順昌靖安都世享眉壽五代相見作堂扁曰世綵士女夫賦詩羨之高宗御覽諭之曰昨見卿家世綵堂詩集可爲人間羨事及剛歿子遲復構堂曰羨事以識天語

楊龜山時舉進士聞程明道講學河洛以師禮見及歸明道目送

之曰吾道南矣明道卒又師事伊川一日見師腹車與游定夫
醉侍立不去覺則門外雪深三尺矣歸杜門不仕者十年後官
至國子祭酒有奉使高麗者國王問龜山先生安在

廖正一字明略將樂人元豐間與晁補之同榜晁贈詩云十年山林
廖居士今隨詔書稱舉子文章宏麗學西京新有詩聲似侯喜
元祐中召試館職除正字東坡大奇之故各亞於蘇門四學士
後入元祐黨

陳了翁瑤嘗言蔡京若秉鈞軸必亂天下後爲都司力排蔡氏之
黨一日朝會與蔡觀語云公大阮真福人也問何以知之了翁

閩中撫聞

延平府

三

白適見於殿庭目視太陽久而不瞬觀以語京京謂觀曰汝爲
我語瑩中既能知我何不容之甚也觀致京語於了翁徐應之
曰射人先射馬擒賊先擒王觀嘿然後竟有郴州之命

侍郎巖舊名翠雲宋熙豐間張侍郎駕楊祭酒時陳司諫瓘讀書
于此相傳三君讀書時不置臥榻歎粥飲水終歲不到巖下
胡器之進士璞經采石題詩吊李白云當時醉弄波間月今作寒
光萬里流東坡見之疑爲唐人所作

鄧志宏蕭號柝欄與朱韋齋松交好一日韋齋醵客柝欄以冠帶
寓之醉起韋齋留以質紙筆明日如約韋齋受筆還冠而紙少

留帶曰倘無千幅竟不還柝欄為寄一詩云歸帽納毫真得策
要箋留帶計還踪公如買菜苦求益我已忘腰何用渠閉戶羽
衣聊自適推窓柿葉對人書帝都聲價君知否寄與新傳折檻
朱其風流調笑如此

尤溪有文山公山隔溪相對邑人義齋鄭氏居此宋朱韋齋為尤
溪尉任滿假館鄭氏建炎庚戌九月十五日文公生焉先是二
山草木繁密及公生野燒同時焚山山形畢露儼若文公二字
延人每於春水後視龍洲沙多寡占歲豐歉宋黃裳詩看此黃龍
沙陡起滿城歌吹入豐年

閩中撫聞

延平府

四

將樂天堦山有玉華洞為赤松子採藥處窈深繚曲遊者當秉炬
以入中有六洞泉流石間怪石萬狀類世間人物產藥材甚多
其陰有洞曰寶華陽有洞曰南華世稱三華明楊載鳴謫尉于
此作遊記

陳氏永安黃貞騰妻夫死自縊明巡道查豹改觀音閣為氏祠為
詩曰人間處處觀音閣天下寥寥節婦祠除却金身祀木主不
知公論是耶非

徐尙鄉南平人萬歷戊午舉人崇禎間守劍州獻賊渡河破昭化請
援不至尙鄉繫印左肘曰此君命也存亡與其登陴督戰矢石

俱盡乃北面再拜曰臣力竭矣以血書襟帶曰孤城不可守仗
節死君恩鼠竄豈無計殊羞衾影存自經於城樓上賊入戒勿
毀其衣冠